



e-mail: xxi_asr@mail.uz



7-YANVAR
2021-YIL
1 (895)

web sayt: www.21asr.uz

@XXIasrofficial

ASR IJTIMOIIY- SIYOSIIY GAZETA

Танзила Норбоева: Айрим депутатлар халқ вакили сифатидаги вазифасини тўлиқ бажара олмаяпти



Олий Мажлис Сенатининг ўн биринчи ялпи мажлисида Сенат Раиси Танзила Норбоева жорий йилда Маҳаллий кенгашлар фаолияти давомида эътибор қаратиши лозим бўлган масалаларга тўхталиб ўтди.

– Бугунги кунгача маҳаллий давлат бошқарув органларининг 25 дан ортиқ масалаларда Маҳаллий кенгашларда ҳисобот бериши белгилаб қўйилган, буни ҳамма Маҳаллий кенгашлар яхши билади. Шундай экан, бу масала Маҳаллий кенгашнинг иш режасида тўлиқ акс эттирилиши мақсадга мувофиқдир. Бунда иш режалар ҳудудларнинг хусусиятидан келиб чиқиб белгиланади. Маҳаллий кенгаш бюджетни тасдиқлаб берувчи эмас, балки бюджетни ижрога

йўналтирувчи органга айланиши кун талабидир.

Жуда кўп мурожаатлар бўлади, баъзиларининг ҳуқуқий асоси йўқ ва нотўғри мурожаатлар ҳам бўлади. Халқимиз тушунмаслиги мумкин, буни эринмасдан тушунтириб бериш керак. Мана шу ишлар қилинмагани учун булар ижтимоий тармоқларга чиқиб кетяпти. Ижтимоий тармоққа чиқиб, мурожаат қилиш урф бўляпти.

Қани ҳоким, депутат ва сектор раҳбари? Нега фуқаролар Пре-

зидент ёки бошқа амалдорларга ижтимоий тармоқларда мурожаат қиляпти? Демак, ана шу органларнинг иши қониқарсиз бўлгани учун одамлар шунга мажбур бўляпти. Бир нарсани тўғри тушунишимиз лозим, ҳал этилмаган ёки тўғри тушунтирилмаган ҳар қандай масала ижтимоий кайфиятга салбий таъсир этади.

Сенатга Маҳаллий кенгашлар депутатларидан миннатдорлик хатлари билан бирга, ўз депутатини танимаслик, маҳаллага бирон марта келмаганлик, мурожаат қилса, умуман жавоб бермаслик каби ҳолатлар бўйича ҳам мурожаатлар келмоқда. Айрим депутатлар халқнинг вакили сифатидаги вазифасини тўлиқ бажара олмаяпти, – деди Танзила Норбоева.

ЎЗА

УШБУ СОНДА:

ТОШКЕНТДАН КАМ ЭМАС
менинг Нукусим!



5

МАКТАБ ҲУДУДИДА... КўП ҚАВАТЛИ УЙ
қурилиши мумкинми?



7

ЎЗИМИЗ ЎТИРГАН ШОХНИ
ўзимиз кесмайлик!



9

ЙЎЛДАГИ ЁЛҒОНЧИЛАР
ёхуд ЙПХ планшетлари
кимларни чув туширяпти?



11

"БОЗОР" КўРГАН АДИБ



12

Мурожаатномага мурожаат

ЯНГИ ЙИЛНИНГ “ЙЎЛ ХАРИТАСИ”

Жаҳон иқтисодиёти ва сиёсий муносабатлар билан боғлиқ воқеалар, турли минтақаларда юзага келадиган ҳолатларнинг омилларини атрофлича таҳлил қилиб борадиган инсонлар яхши биладики, Мурожаатнома билан чиқишнинг ўзига хос сабаблари бор. Айниқса, давлат раҳбарларининг парламент ва халққа мурожаати замирида ўта муҳим масалалар моҳияти мухтасар акс эттирилади. Шунинг учун у халқро миқёсда ҳам, муайян мамлакатнинг ўзида ҳам кенг жамоатчилик ва нуфузли экспертлар томонидан жиддий таҳлил қилинади. Мутахассислар учун ўнлаб илмий тадқиқотларга мавзу бўлади. Боиси айни ҳужжат барча соҳалар учун яқин истиқболдаги “Йўл харитаси” ҳисобланиб, унда изчил ислоҳотлар қай йўналишда давом этиши етакчилик призмаси орқали ёритилади.

Ўзбекистон Республикаси Президенти Шавкат Мирзиёевнинг Олий Мажлисга Мурожаатнома йўллаши аъъанавийлик касб этиши баробарида нафақат маҳаллий, балки хорижий сиёсатчилар эътиборини ҳам тобора кўпроқ жалб қилаётгани ҳеч кимга сир эмас. Чуқур таҳлил ва аниқлик тамойилига асосланган бу галги Мурожаатномада ҳам иқтисодий ва ижтимоий-сиёсий тараққиётнинг устувор йўналишлари белгилаб берилган.

Тадбиркорлар ва ишбилармонлар ҳаракати – Ўзбекистон Либерал-демократик партияси фаолларининг фикр-мулоҳазалари ана шу тармоқ ва соҳаларда кутилаётган “ўсиш нуқталари”нинг айримлари ҳақида.

2-3▶

ЯНГИ ЙИЛНИНГ

◀ Бошланиши 1-саҳифада.



**МУХТОР ИБРАГИМОВ,
ОЛИЙ МАЖЛИС
ҚОНУНЧИЛИК
ПАЛАТАСИДАГИ О'zLiDeP
ФРАКЦИЯСИ АЪЗОСИ**

Таълимга инвестиция – келажакка сармоя

Мурожаатнома юрт равнақиға бефарқ бўлмаган ҳар қандай кишининг диққатини тортади. Зотан, давлатимиз раҳбари илгари сураётган ташаббуслар, амалга ошираётган кенг кўламли ислохотлар пировардида илму маърифатли баркамол авлодни тарбиялаш гоёси мужассамдир. Таълим жараёнини тубдан такомиллаштириш энг долзарб масала сифатида кун тартибига қўйилиши педагоглар зиммасига улкан масъулият юклайди.

“Янги Ўзбекистон – мактаб оstonасидан, таълим-тарбия тизимидан бошланади”, деган даъват маориф соҳасининг барча ходимлари ва фидойи муаллимларни руҳлантириш билан бирга гоёт шарафли вазифаларни олдимишга қўйгани билан аҳамиятлидир. Президентимизнинг “Жамиятда ўқитувчи касби энг нуфузли ва обрўли касб бўлиши лозим”, дея эътироф этганининг ўзи миллионлаб қалбларни гу-

рур-ифтихорга тўлдирди. Очигини айтиш керакки, кейинги йилларда мамлакатимизда таълимга берилётган алоҳида эътибор таҳсинга лойиқ. 2021 йилнинг “Ёшларни қўллаб-қувватлаш ва аҳоли саломатлигини мустаҳкамлаш йили”, деб номланиши муносабати билан кўриладиган чора-тадбирлар эса ёшларимизнинг интеллектуал салоҳиятини ошириш йўлидаги ислохотларимизнинг тадрижий давоми бўлади.

Кези келганда, Мурожаатномада тилга олинган баъзи рақамларни яна бир бор ёдга олиш ўринлидир. Хусусан, 2021 йилдан бошлаб болаларни мактабгача таълим тизимига қамраб олиш 65 фоизга, 2023 йилгача 75 фоизга етказилиши, бунинг учун бюджетдан 600 млн доллар миқдорига субсидия ажратилиши давлатимиз раҳбарининг узоқни кўзлаган сая-ҳаракатларининг ёрқин

ифодасидир. Тумандаги олис мактабга бориб дарс берадиган ўқитувчилар ойлигига 50 фоиз, бошқа вилоятга ўтиб ишлаганларга эса 100 фоиз устама тўланиши ҳам аввал кузатилмаган ҳодиса.

Бундай рағбат муаллимларни инновацион ёндашувга чорлайди. Ўқувчиларнинг мантиқий мушоҳада юритиши, ижодкорлик, яратувчанлик ва креатив фикрлаш қобилиятларини янада ривожлан-



**НОДИР АБДУВАЛИЕВ,
ОЛИЙ МАЖЛИС ҚОНУНЧИЛИК
ПАЛАТАСИДАГИ
О'zLiDeP ФРАКЦИЯСИ АЪЗОСИ**

Бундай халқлар дунёда жуда кам

Бугун бой маданий меросимизни асраб-авайлаб, келажак авлодлар учун безавол етказиш ҳам устувор вазифалардан саналади. Ҳозирда уларнинг сони 7 мингдан зиёд. Бу дурдоналар қадимги маданий ҳаёт, аждодаларимиз турмуш тарзини ўрганишда беқиёс аҳамиятга эга.

Янги Ўзбекистонда моддий ва номоддий маданий меросни сақлаш ҳамда тарғиб этиш, маданият ва санъат соҳасини инновацион ривожлантиришга қаратилган тизимли чора-тадбирлар амалга оширилмоқда. Лекин айрим обидаларимизга зарар етказиш ҳолатлари ҳали-ҳануз учраётгани кўнгилни ғаш қилади. Шу сабабли уларни бус-бутунлигича асраб қолиш юзасидан тезкор чоралар кўриш лозим. Бунга нафақат Маданият вазирлиги, балки маҳаллий ҳокимликлар, маҳалла, оммавий ахборот воситалари ва кенг жамоатчилик ҳам бирдек масъулдир.

Мурожаатномада шу каби масалаларга алоҳида тўхталиб ўтилгани бежиз эмас. Зеро, тарихий, маданий ва маънавий меросимизни ўрганиш, уларни кўз қорачиғидек асраб-авайлашнинг кадр-қиммати жуда юқори. Буюк Ипак йўлида жойлашган юртимизда азалдан доврўф қозонган меъморчилик обидалари бутун инсониятнинг бебаҳо мулкидир. Бундай бой меросга эга бўлган халқлар дунёда жуда кам.

Президентимизнинг Тошкент шаҳри марказида Миллий академик драма театри, машхур япон архитектори Тадао Андо лойиҳаси асосида янги санъат музейи, замонавий кутубхона ҳамда Алишер Навоий номидаги халқаро ижод мактабидан иборат маданият ва маърифат мажмуасини барпо этиш тўғрисидаги таклифи ҳам соҳага қанчалик катта эътибор берилётганининг амалий тасдиғидир.

Мустақиллигимизнинг 30 йиллигига бағишлаб пойтахтимизда “Истиқлол” мажмуаси қад ростлаши, илгари кўп йиллар давомида ўтказиб келинган Тошкент халқаро кинофестивали “Ипак йўли дурдонаси” номи билан қайта ташкил этилиши ҳақидаги фикрлар юртдошларимиз қатори мени ҳам тўлқинлантириб юборди.

Маданият ва санъат муассасалари фаолиятини жонлантириш, уларнинг моддий-техник базасини мустаҳкамлашга бюджетдан 420 миллиард сўм йўналтирилиши, айниқса, худудларда 22 та театр ва маданият объекти қурилиши айтишга осон ишлар холос.

Соғлом ва шижоатли ёшлар – мақсадга элтувчи куч

Мен Мурожаатномани Фарғона вилояти ҳокимлигидаги студияда бевосита тинглаб, шу ернинг ўзида қатор вазифаларни ёзиб олдим.

Барчамизга маълумки, 2020 йилда бутун дунё халқлари коронавирус пандемиясидан азият чекди. Бу ҳолат, афсуски, Ўзбекистонимизни ҳам четлаб ўтмади. Президентимиз томонидан кўрилган тезкор чора-тадбирлар, ишлаб чиқилган махсус дастурлар ижроси туфайлигина вирус оқибатларини юмшатишга, аҳоли саломатлигини муҳофаза қилишга эришилди.

Пандемия шароитида халқимиз ўзининг миллий қадрият, меҳр-оқибат, саховат ва мурувват каби азалий анъаналарига содиқ қолгани Мурожаатномада алоҳида эътироф этилди. Шу боис кам таъминланган оилалар, якка-ёлғиз кексалар, ногиронлиги бор фуқаролар доимий эътиборда бўлди. Уларга ҳар томонлама моддий ва маънавий қўмаклашилди.

Айни даврда хориждан 600 мингдан ортиқ ватандошимиз олиб келинди. Инқирозга қарши жамғарма ташкил этилиб, коронавирус билан курашиш, аҳоли ва

корхоналарни қўллаб-қувватлаш билан боғлиқ тадбирларга бюджетдан 16 триллион сўмдан ортиқ маблағ йўналтирилди. Давлат корхоналари ва 500 мингдан зиёд тадбиркорлик субъекти ҳамда қарийб 8 миллион фуқарога жами 66 триллион сўмлик солиқ имтиёзлари, кредит муддатларини узайтириш ва молиявий қўллаб-қувватлаш бўйича амалий ёрдамлар берилди.

Пандемия даврида ишбилармонликни кенг қўллаб-қувватлаш бўйича кўплаб имтиёз ва энгилликлар берилди. Тадбиркорлик субъектларига 100 триллион сўм ёки 2016 йилга нисбатан қарийб 4 баробар кўп кредитлар ажратилди.

Янги 2021 йилда Ўзбекистон Республикасининг давлат мустақиллигига 30 йил тўлади. Албатта, бу тарихий санани “Янги Ўзбекистонда эркин ва фаровон яшайлик!” деган эзгу гоё асосида кенг байрам қиламиз. Шундан келиб чиқиб О'zLiDeP ҳам ўз олдига долзарб вазифаларни қўйди.

Учинчи Ренессанс пойдевори қўйилаётган юртимизда ёшларнинг илм-фанга бўлган қизиқишини ошириш борасида аниқ тизимли ишлар олиб борилаётир. Бу йўлда,



**НАФИСАХОН ЭЛЧИЕВА,
ХАЛҚ ДЕПУТАТЛАРИ
ФАРҒОНА ВИЛОЯТИ
КЕНГАШИ ДЕПУТАТИ**

албатта, соғлиқ муҳим ўрин тутуди. Зеро, соғ танда соғлом ақл, деганларидек, барчамиз соғлом ҳолатда, шижоатли ёшларимиз билан барча кўзлаган мақсадларимизга эришамиз.

“ЙЎЛ ХАРИТАСИ”



НИЛУФАР ЖАББОРОВА,
O'zLiDeP ХОРАЗМ ВИЛОЯТ КЕНГАШИ СИЁСИЙ
ТАЪЛИМ СЕКТОРИ МУДИРИ

Малакали кадрларга юксак этибор инъикоси

Муружаатномада кўтарилган барча масалалар, тилга олинган ҳар бир соҳа, белгиланган долзарб вазифалар ижроси замирида бутун халқимизнинг эртанги кунни мужассам. Масалан, унда ёшларга этибор ҳар қачонгидан ҳам кўпроқ, десам муболаға бўлмайди. Бола туғилганидан бошлаб, таълим-тарбия олиши, улғайиб камолга етиши, касб-ҳунар эгаллаши, олий таълимни, чет эллардаги нуфузли даргоҳларда билим олишлари, иқтидорли ва ташаббускор ёшларни қўллаб-қувватлаш учун маблағ аялмаслиги... бу каби асоси таъминланган ислохотлар занжирини ис-талганча санаш мумкин.

Авалло, ўқув дастурлари, ўқитувчилар учун методик қўлланмаларни илғор халқаро дастурларга мослаштириш лозимлиги, болаларнинг тахлилий ва креатив фикрлаш қобилиятини ривожлантириш учун уларга сермазмун ва тушунарли дарсликлар яратиш зарурлиги, бу борада келгуси ўқув йилида бошланғич синфларда давлат таълим стандарти ўрнига, илғор хорижий тажриба негизда болага ортиқча юклама бермайдиган “Миллий ўқув дастури” жорий этилишининг ўзи соҳадаги туб бурилишдир.

Олий таълимни ислох этиш профессор-ўқитувчиларнинг малакаси, маҳорати ва билимига боғлиқ. Бу борада яна бир масала – педагоглар малакасини ошириш, уларнинг машаққатли меҳнатини рағбатлантириш – уларнинг “ҳаёт давомида ўқиш” тамойили асосида ўз малакасини узлуксиз ошириб бориши йўлга қўйилади.

Бизни алоҳида қувонтирадиган яна бир муҳим йўналиш, олий таълимнинг қамрови ва сифатини оширишга алоҳида этибор қаратилгани бўлди. Чунончи, кейинги йилдан бошлаб, олий таълимга ажратиладиган давлат грантлари сони камида 25 фоизга оширилиши,

олий ўқув юртларига қабул қилишда эҳтиёжманд оилалар қизлари учун грантлар сонини 2 баробарга кўпайтириб, 2 мингтага етказиш таъкидланди. Аъло баҳоларга ўқиётган, ижтимоий ҳимояга муҳтож қизлар учун махсус стипендиялар жорий этилиши эса ўксик кўнгилларнинг ҳаётда ўзларига бўлган ишончини янада мустаҳкамлашга туртки бўлади.

Ёшларнинг энг нуфузли олий ўқув юртларини инobatга олиб, хусусий олий даргоҳларга ҳам керакли мутахассисларни тайёрлаш бўйича давлат буюртмаси бериш тизими йўлга қўйиладиган бўлди.

Таълим тизимига этибор йилдан-йилга ортиб бормоқда ва бу янги йилда юртимиздаги 30 та етакчи олий таълим масканига ўқув дастурларини ишлаб чиқиш, қабул квотаси ва молиявий масалаларни мустақил ҳал қилиш ҳуқуқи берилганидан, келгуси йилда илм-фан соҳасида олий даргоҳлар ва илмий ташкилотлардаги докторантлар сони 4,5 мингтага етказилиши ёки 2017 йилга нисбатан 3 баробарга оширилиши, ушбу мақсадлар учун бюджетдан қўшимча 240 миллиард сўм ажратилиши сўзимиз исботи бўла олади.

Биз каби магистратура-ни тугатган ёш ходимларни олий таълимда фаолият юртишимиз, илмий изланишлар олиб боришимиз ва албатта илмий салоҳиятга эга бўлишимизда яна бир катта қадам ташланди. Доцент ва профессор илмий унвонлари, фалсафа ва фан доктори илмий даражаларини бериш ваколати ўз йўналиши бўйича нуфузли бўлган олий ўқув юртларининг илмий кенгашларига ўтказилиши билан ҳар бир ёш педагогнинг марказга бориб-келиб вақт йўқотиши, оиласидан узоқда илмий иш қилиши каби овворагарчиликларнинг, моддий-маънавий зараларнинг олдини олишга катта ёрдам беради.

Президентимиз халқимизнинг эртанги кунга бўлган ишончини янада мустаҳкамлаш билан бирга барчамизни эзгу мақсадлар йўлида ўз ишимизга масъулият билан ёндошишга юксак минбарда туриб оталарча даъват этгани ҳар биримизга қаттиқ таъсир қилди. Чунки Муружаатномада давлат ва жамият ҳаётининг барча соҳаларида амалга ошириладиган ишлар фақатгина муайян тоифа ва лавозимдаги кишилар вазифаси эканлиги, ислохотлар мувафақиятидан барча бирдек манфаатдорлиги очиб берилди.

Этиборли томони, 2021 йил республикамизда фаолият кўрсатаётган сиёсий партиялар учун ҳам яна бир синов, яна бир имтиҳон – Президент сайлови йили эканлиги Муружаатномада тилга олингани бежиз эмас. Бу борада фақат сиёсий партиялар эмас, балки фуқаролик жамиятининг бошқа институтлари фаолигини ошириш, уларнинг ваколатларини кенгайтириш кераклиги таъкидланди.

Яна бир соҳа – тадбир-

КОМИЛЖОН
ЖУМАНИЁЗОВ,
O'zLiDeP ҚОНЛИКЎЛ
ТУМАН КЕНГАШИ
АППАРАТ РАҲБАРИ,
ТУМАН КЕНГАШИ
ДЕПУТАТИ



Тадбиркорликка янада кенг имкониятлар очилди

корликни ҳар томонлама қўллаб-қувватлаш, ишбилармонлар синфига қўл-қанот бўлиш кераклиги хусусидаги фикрлар эса O'zLiDeP фаоли сифатида юрагимиздан жой олди. Айниқса, электоратимизнинг ўз бизнесини янада ривожлантириш, хусусий мулк дахлсизлигини таъминлаш, мулкчилик фаолияти билан боғлиқ буйруқбозлик тўсиқларини бартараф этиш

мақсадида “Тадбиркорлик кодекси”ни ишлаб чиқиш таклифи илгари сурилгани ҳаммамизни қувонтирди. Зотан, энди Тадбиркорлар ва ишбилармонлар ҳаракати – Ўзбекистон Либерал-демократик партияси сайловолди дастуридан ўрин олган айни йўналишдаги вазифаларни амалга ошириш имконияти янада кенгайиши шубҳасиз.



ЙЎЛДОШ
ЖЎРАЕВ,
ЮРИДИК ФАНЛАР
ДОКТОРИ

Давлатчилик асосларини демократлаштириш дастури

Муружаатномада белгиланган марралар инсон манфаатларини таъминлашга қаратилганки, уларнинг бажарилишида ҳеч бир киши бефарқ бўлиши мумкин эмас. Уларнинг инсон, жамият ва миллат равнақига мўлжалланганлиги ҳар бир кишининг ғайрат ва шижоатини ошириши аниқ. Давлатнинг ўз гарданига олаётган мажбуриятлари шунчаки қуруқ ваъдалар эмаслигини сезиб, ниҳоятда қувонасан.

Биз Муружаатномани учга бўлиб тавсифлаган бўлар эдик. Биринчи қисми ютуқлар ва орттирган обрў-этиборимиз тўғрисида. Иккинчиси – вазифалар ва жаҳонни янада “тўлдириш” режалари ҳақида. Учинчиси – Ватан равнақидан

ғурурланиш ҳиссини янада бойитиш мақсадлари.

Этибор қилинг, белгиланган устувор вазифалар, яъни давлат ўз зиммасига олган жорий йилда бажариши лозим бўлган мажбуриятларнинг 60-70 фоизи ижтимоий масалаларга тегишлидир. Аҳоли саломатлигини асраш ва мустаҳкамлаш, таълим ва тарбияни ривожлантириш, илм-фан ва инновацияларни тараққий эттириш, муҳтож болаларга алоҳида меҳр-мурувват кўрсатиш, соғлиқни сақлаш тизимини тақомиллаштириш, камбағалликни қисқартириш, эҳтиёжманд аҳолини қўллаб қувватлаш каби масалалар шулар жумласидан.

Яна бир муҳим жиҳат, таркибий ислохотларнинг долзарб йўналиши бу – давлатнинг иқти-

содиётдаги иштирокини камайтириш ҳисобланади. Демак, инсон ва хусусий мулк омилининг устунлигини таъминлаш кучайтирилади. Бу бозор иқтисодиётининг жаҳонда умум тан олинган қонуниятидир. Яъни, Президентнинг таклифига кўра, бир томондан давлатнинг иқтисодиётда иштирокини камайтириш сиёсати давом эттирилади. Иккинчи томондан эса хусусий мулк дахлсизлигини таъминлаш кучайтирилади.

Муружаатномага бинотан давлатнинг иқтисодиётга аралашувини камайтириш ва иқтисодиётга эркинлик бериш мақсадида давлат мулкни трансформация қилиш ишлари олиб борилади. Корхоналардаги давлат улуши сотилиб, монополияни камайтириш, соғлом рақобатни вужудга келтириш ишлари амалга оширилади.

Айниқса, тадбиркорларнинг мулк ҳуқуқи дахлсизлигини ҳаққоний таъминлаш бўйича жиддий ёндашув амалга оширилиши диққатга сазовар. Шу ўринда Юртбошимизнинг: “...айрим жойларда давлат органлари тизимидаги раҳбар ва мутасаддилар томонидан тадбиркорларнинг мулкка доир ҳуқуқларини бузиш ҳолатлари давом этмоқда. Бундай мансабдорларни маъмурий жавобгарликка тортиш бўйича Бизнес-омбудсманга ваколат беришни таклиф этаман”, деган гапларида катта маъно мужассам.

Қўлга киритган ютуқларимиз ҳақиқатда оламшумул. Уларнинг ҳаммаси ҳам мамлакатимиз ижтимоий-иқтисодий жаҳаларини янада юқори кўтарилишига замин яратади. Лекин эришган натижаларимизга маҳлиё бўлиш бизга ярашмайди. Шундай экан, барчамиз бир тану бир экон бўлиб, мамлакатимизнинг миллий манфаатларини таъминлаш учун ҳаракат қилишимиз лозим.

Кувонарлиси, жона-жон Ўзбекистонимиз мустақиллигининг 30 йиллигини ҳам кенг нишонлаймиз 2021 йилда. Тарих учун лаҳзадек қисқа бу ўтган давр унутилмас воқеалар, жўшқин ҳаёт инъом этди.

Президентимиз Шавкат Мирзиёев ўтган йил 17 декабрь куни имзолаган “Ўзбекистон Республикаси Давлат мустақиллигининг ўттиз йиллик байрамига тайёргарлик кўриш ва уни юқори савияда ўтказиш тўғрисида”ги қарор бу борада катта аҳамиятга моликдир. Хужжатда ёшларга оид давлат сиёсатини самарали олиб бориш, жумладан, уларнинг таълим олиш имкониятларини кенгайтириш, муносиб иш билан таъминлаш, меҳнат бозорида талаб юқори бўлган касб-хунарларга тайёрлаш хусусида ўқиб, айрим мулоҳазаларимни баён этишга қарор қилдим.

Айтиш жоизки, карантин бошлангач, аксариятимиз вақтимизни уйда ўтказдик. Илм, ижод ёки бирор хунар билан шуғулланганилар, томорқасида юмуши борлар ёки кафтдеккина ерга эга деҳқонлар шу кунлари ҳам бирор сония вақтини беҳуда ўтказмади. Аммо тўрт метр жойни кетмонлаб қўйишга эриниб, шунга ҳам мардикор ёллашга ўрганган айрим кимсалар эса бўш вақтларини телевизор остида ёнбошлаб ёки дарвоза

Ўзликни англаш мутолаа, илм-фан ва таълим-тарбиядадир

ёнидаги скамейкада бекорчи ошналари билан нарда ё карта ўйнаб ўтказишди. Ёши бир жойга бориб қолган бўлса-да, ҳануз ўспиринча фикрлайдиган ва яшайдиган бундай кимсаларни кўрганимда, айниса, нохуш манзараларнинг ёшлар тарбиясига таъсири ҳақида ўйлаганимда уларга ачинишни билмайсан, дашном беришниям.

Эҳтимол, кимдир юқоридаги фикрларимизни ўқиб, “ахир булар ўғрилиқ ёки бирор ҳаром-хариш иш қилмаётган бўлса, шу арзимас нарсага ҳам ваҳима қилиш шартми?” дейиши табиий. Бизнингча, мана шундай арзимас бўлиб кўринган ҳолатларга ҳам ваҳима эмас, ҳатто бонг урадиган фурсат келди. Чунки ҳаётда фарзандларимиз тарбияси, ахлоқ-одоби, таълим-тарбияси билан боғлиқ нимаики номақбул бўлса, унга бефарқ қарашга ҳаққимиз йўқ.

Катта-кичик давраларда фарзандларимизга “Бўш вақтингиз – бойлигингиз. Уни бекор ўтказманг. Ёшлик бошқа қайтиб келмайдиган катта имкониятлар фасли”, деган гаплар кўп айтилади. Аммо уларнинг ҳаммаси ҳам бу панд-насихатларга қулоқ солишавермайди. Гоҳи, ўйлаб қоламан, уларнинг шундай бўлишига катталарнинг ўзлари сабабчи эмасми? Халқимизда

бир гап бор: “Аввал ўзинга боқ, кейин ногора қоқ”. Хўш, катталаримизнинг ўзлари чиройли хулқи ва ижобий ишлари билан намуна бўлмаса, ёшларни яхшилиқка чорлашдан самара бўлармикан?

Тасаввур қилинг, бирон-бир банкдаги ҳисоб рақамингизга ҳар куни эрталаб 86 400 сўм миқдорида кредит ажратилади. Ҳар кечқурун эса ундан кун бўйи сарфланмаган қисми ўчириб ташланиши керак. Хўш, сиз нима қилган бўлардингиз? Албатта, ҳар бир тийиндан самарали фойдаланишга ҳаракат қиласиз. Ҳар биримизга мана шундай банк бериб қўйилган. Унинг номи ВАҚТ! Ҳар тонгда сизнинг номингизга 86 400 сония миқдорида сармоя ажратилади. Ҳар оқшом эса унинг фойдали ишлар учун сарфланмаган қисми йўқотилган ҳисоблаиб, ўчириб ташланади. Ҳар куни “банк” сиз учун янги ҳисоб рақами очади, ҳар тун куннинг қолдиғини қайтариб олади. Кредитни янгилашнинг эса иложи йўқ. Бунга ҳуқуқ берилмаган. Кундалик “депозит”ни бекор ўтказсангиз, ўзингизга зарар. Орқага қайтишга йўл йўқ. Эртага умид, соғлиқ, бахт ва омаддан унумли фойдаланишингиз учун бугуннинг имкониятлари билан яшашингиз керак. Соат миллари фақат олдинга интилади, орқага

Атхам НАЗИРҚУЛОВ,
Олий Мажлис Қонунчилик
палатаси депутати,
O‘zLiDeP фракцияси аъзоси



эмас. Буни қадрига етишимиз лозим.

Бир йилнинг қадрини чақалоқни дунёга келтирган онадан сўранг. Бир дақиқанинг қадрини метрога улгурмай қолган йўловчидан сўранг. Бир сониянинг қадрини фалокатдан қутулиб қолган ҳайдовчидан сўранг. Бир миллисониянинг қадрини Олимпия ўйинларида кумуш медалга лойиқ топилган спортчидан сўранг.

Ёшлик – инсон умрининг баҳори, дедик. Энди айтинг-чи, оилангизда камол топаётган фарзандлар ёшлик берган имкониятлардан унумли фойдаланяптими? Унутманг, ҳар бир дақиқани, ҳар бир сонияни кўз қорачиғидек асраш керак. Кеча – бу ўтмиш. Бугун – бу ҳазина. Эртага – бу мўъжиза. Шу боис у қайтмас имкониятдир.

Ўқитувчи ва мураббийлар куни муносабати билан ўтказилган тантанали маросимда Президентимиз, биз боғча тарбиячиси, мактаб муаллими, профессор-ўқитувчилар ва илмий-ижодий зиёлиларимизни янги Ўйғониш даврининг тўрт таянч устунни, деб ҳисоблаймиз, дедилар. Мен мустақил юртда яшаб, илм олаётган, хунар ўрганаётган, хуллас, ёшлик берган имкониятлардан унумли фойдаланаётган фарзандларимизни ҳам янги даврнинг таянч устунларидан бўлишини жуда истар эдим. Зеро, эндигина истиқлолнинг навқирон ўттиз ёшини нишонлаш арафасида турган, улуғлар, азиз авлиёлар руҳи поклари мангу макон топган бизнинг диёримизда миллатни буюк қиладиган куч – бу мутолаа, илм-фан ва таълим-тарбиядир.

Саховат

Меҳр қолур, муҳаббат қолур...

“Кимки бир кўнгли бузугнинг хотирин шод айлағай, Онча борким, Каъба вайрон бўлса, обод айлағай”. Буюк шоиримизнинг ана шу эзгу ўғити, даъвати бир зум ҳам унутилаётгани йўқ. Хусусан, сайловолди дастуримизда партия имконияти чекланган, ногирон шахслар ўзларини жамиятнинг тўлақонли аъзоси деб ҳис этиши, бизнесини йўлга қўйиб, келажagini ўз қўли ва ҳаракатлари билан барпо этадиган реал шарт-шароитларни яратишга интилиши белгилаб қўйилган.

Бунинг шунчаки қуруқ ваъда эмаслиги сафдошларимизнинг хайрли, савоб ишларни қанда қилмаётганида, кўнгли ярим, муҳтож юртдошларимизга ҳар жиҳатдан далда беришга сидқидилдан киришаётганида кўзга ташланияпти.

Яқинда Бухоро шаҳридаги ихтисослашган 23-мактаб-интернат одатдагидан кўра гавжум бўлди. Бу муассасада

партиямиз учрашув ўтказди. O‘zLiDeP Бухоро шаҳар кенгаши раиси, шаҳар кенгаши депутати Жонибек Матниёзов, партия ташкилоти аппарати раҳбари Нўъмон Саъдуллаев ва бошқа фаолларимиз ўқувчилар олдида чиқиш қилиб, юртимизда беистисно барча фуқаролар учун катта имкониятлар, шарт-шароитлар яратилгани, партиянинг имконияти чекланганларни



қўллаб-қувватлаш йўналишида олиб бораётган ишлари хусусида сўз юритди. Учрашув сўнигида болаларга ўқув қуруллари, турли ширинликлар туҳфа қилинди.

Ана шундай тадбирлардан яна бири шаҳардаги Аёллар мурувват уйида ташкил этилди. Мулоқот жуда қизиқарли ўтди. Жумладан, хотин-қизлар саволларига “Аёллар қаноти” фаоллари батафсил жавоб бердилар. Шаҳар кенгаши депутати Ҳалим Сафаров томонидан инъом этилган пардоз-андоз

воситалари, турли маиший ашёлар аёллар қувончига қувонч қўшди.

Партия Вобкент тумани ташкилоти китобхонлик, она тилимиз тарғиботи қаратилган ишларга алоҳида эътибор қаратяпти. Масалан, яқинда турли муассасалар томонидан ўтказилган “Ўзбек тилим – тиллар ичра ягона” кўрик-танлови голибларини рағбатлантиришга муносиб ҳисса қўшди.

Асхор ИСТАМОВ,
“XXI asr” мухбири



Муносабат

Очиқ ва амалий ташқи сиёсат эътирофи

Президентимиз томонидан парламент ва халқимизга йўлланган Мурожаатномада ижтимоий, иқтисодий, сиёсий, маданий-гуманитар ривожланишнинг долзарб муаммоларини ҳал қилиш бўйича вазифалар аниқ белгилаб берилиб, мамлакатимизнинг ташқи сиёсатига ҳам алоҳида эътибор қаратилди. Хусусан, кейинги йилларда амалга ошири- лаётган очиқ, амалий ва конструктив ташқи сиёсат, шунингдек, узоқ муддатли стратегик мақсадларни ҳисобга олган ҳолда, Ўзбекистон Республикасининг Ташқи сиёсий фаолият концепцияси такомиллашти- рилиши таъкидлаб ўтилди.

Марказий Осиё дав- латлари билан кўп асрлик дўстлик, яхши қўшничилик муносабатлари, стратегик шериклик ва ўзаро ишонч- ни янада мустаҳкамлашга алоҳида эътибор қарати- лиши муҳим аҳамиятга эга. Бундай ижобий жара- ёнларни ҳар томонлама ва изчил ўрганиш учун 2020 йилда Тошкентда Марказий Осиё халқаро институ- ти ташкил этилганди.

Бугунги кунда кўплаб кузатувчилар барча соҳа- ларда алоқаларни мус- таҳкамлашга ва минтақа- даги зиддиятлар потен- циалини камайтиришга ҳисса қўшадиган мутлақо янги сиёсий муҳит яратилганлигини мамнуният билан қайд этмоқдалар. Минтақадаги бундай се- зиларли силжишларнинг катализатори айнан Ўз- бекистон Республикаси- нинг янги ташқи сиёсий йўналиши эканлиги сир эмас. Инчунун, Тошкент ташаббуслари Марказий Осиё мамлакатлари томо- нидан кенг қўллаб-қувват- ланмоқда.

Мурожаатномада мам- лакат ташқи сиёсатининг асосий устувор йўналиши Марказий Осиё минтақаси бўлиб қолиши, бу Ўзбеки- стоннинг миллий манфаат- лари билан боғланганлиги бир неча бор тилга олинди. Президентимиз аввал ҳам, яъни 2017 йил сентябрь ойида БМТ Бош ассамбле- яси йиғилишидаги нутқида Ўзбекистон ташқи сиёса- тининг асосий йўналишларини эълон қилган ҳолда, давлатларам алоқаларни мустаҳкамлашга алоҳида урғу бериб, Марказий Осиё давлатлари раҳбар- ларининг маслаҳатлашув учрашувларини ташкил этиш ташаббуси билан чиққан эди.

Марказий Осиё дав- латлари учун муҳим ма- салалардан бири Афғони- стонда тинчлик ва барқа- рорликни таъминлаш, ўза- ро ижтимоий, иқтисодий, гуманитар соҳада ҳамкор-

ликни ривожлантириш ҳи- собланади. Боиси қўшни давлатга узоқ кутилган тинчлик келиши Марказий Осиё минтақасида хавф- сизлик ва барқарорликни таъминлашнинг асосий омилидир. Шу нуқтаи назардан айтиш жоизки, Афғонистон Тошкент томонидан минтақанинг ажралмас қисми сифати- да қаралади.

Давлатимиз раҳбари Тошкент халқаро конфе- ренцияси афғон муаммо- сини ҳал қилиш бўйича глобал саъй-ҳаракатларни илгари суриш учун му- стаҳкам пойдевор ярат- ганлиги бежиз таъкидлама- ди. Марказий Осиёни Ҳинд океани билан боғлайдиган Трансафғон транспорт йўлагини куриш лойиҳаси- ни амалга ошириш бўйича дастлабки амалий қадам- лар қўйилди.

Мурожаатномада асо- сий шериклар – Россия, Хитой, АҚШ, Туркия, Гер- мания, Франция, Буюк Британия, Жанубий Ко- рея, Япония, Ҳиндистон, Покистон, Бирлашган Араб Амирликлари син- гарии мамлакатлар билан кўп қиррали ва ўзаро ман- фаатли алоқаларни янада кенгайтириш, самарали иш тизимини жорий этиш режалаштирилганига урғу берилди.

Яқунига етган йилда Ўзбекистон Евроосиё иқтисодий иттифоқи- да кузатувчи мақоми- ни олди. Ушбу ташки- лотга аъзо давлатлар- нинг бозорларида кенг миқёсда иштирок этиш учун миллий техник ре- гламент стандартларини ЕОИИ талабларига му- вофиқлаштириш бўйича ишларни тезлаштириш зарурдир. Бундан ташқа- ри, тарихда биринчи мар- та Ўзбекистон БМТнинг Инсон ҳуқуқлари бўйи- ча Кенгаши аъзоси этиб сайланди. АҚШ Давлат департаменти томонидан Ўзбекистоннинг диний эр- кинлик соҳасидаги “мах-

сус кузатув” давлатлари рўйхатидан чиқарилиши ҳам амалга оширилаётган кенг кўламли демократик ислохотларнинг эътиро- фидир.

2021 йилда БМТ ҳомий- лигида “Инсон ҳуқуқлари бўйича таълим” глобал форуми, ёшлар ҳуқуқла- рига бағишланган Бутун- жаҳон ёшлар анжумани ва диний эркинлик маса- лалари бўйича минтақавий конференцияларни ўтка- зилиши ҳам Мурожаатно- мада алоҳида таъкидлан- гани эътиборга моликдир.

Тошкентда Марказий Осиё минтақаси ва Жану- бий Осиё муносабатлари- га доир юқори даражадаги халқаро конференция, Хива шаҳрида ЮНЕСКО билан ҳамкорликда “Мар- казий Осиё жаҳон цивили- зациялари чорраҳасида” номли халқаро анжумани- ни ўтказиш режалашти- рилгани ҳам диққатга са- зовор.

Дунёнинг кўплаб мам- лакатларида яшовчи ва- тандошлар билан алоқа- ларни қўллаб-қувватлаш ва мустаҳкамлаш учун “Ватандошлар” жамғар- масини яратиш устувор вазифалардан биридир. Маълумки, ҳар йили 30 июль Халқаро дўстлик куни сифатида кенг ни- шонланади. Шу муноса- бат билан Президентимиз ушбу санани Ўзбекистон- да Халқлар дўстлиги куни деб белгилашни таклиф қилди.

Умуман олганда, мам- лакат ташқи сиёсий йўна- лишидаги ўзгаришлар Ўзбекистоннинг минтақа- даги ва глобал миқёсдаги мавжуд муаммоларни ҳал этишга комплекс ёндо- шишини намойиш этади. Улар келажакда ўзаро манфаатли ҳамкорлик учун янада катта асос ҳи- собланади.

Бобур ҲАЛИМОВ
O‘zLiDeP Сиёсий Кенгаши
Ижроия қўмитаси етакчи
консультанти

Ватан манзаралари



Тошкентдан кам эмас менинг Нукусим!

Очигини айтмай, бошқа юртларда шундай анъана ёки тажриба бор-йўқлигини аниқ билмайман. Худудларда амалга оширилаётган ислохотлар натижаларини, одамларнинг кайфиятини қандайлигини давлат раҳбарининг шахсан ўзи бориб кўриши билан боғлиқ жараёнинг изчиллигини назарда тутаяпман. Бу борада Ўзбекистон етакчи назаримда. Диққатга сазовор жиҳати шундаки, мазкур ташрифлар мақоми танишув даражасидан анча устун. Ҳар сафар бир янгилик кузатилаётгани фикримиз далили бўлиши мумкин.

Президентимиз Шавкат Мирзиёев икки ой аввал Қорақалпоғистонга келганда айтган гапи ҳозир ҳам қулоғимда жаранглаб тургандек: “Тошкентда қандай янгилик бўлса, албатта Нукусга келиши керак”. Юртбошимиз даъвати қисқа муддатларда расмий ҳужжатларга кўчди ва амалий ишлар бошлангани эътироф этиш жоиз.

Ўзбекистон Республикаси Президенти 2020 йил 11 ноябрдаги “2020-2023 йилларда Қорақалпоғистон Республикасини комплекс ижтимоий-иқтисодий ривожлантириш чора-тадбирлари” тўғрисидаги қарори қабул қилингани барчамизга маълум. Унда Оролбўйи ҳудудининг ижтимоий-иқтисодий шароитини тубдан яхшилаш баробарида янги иш ўринларини яратиш бўйича мақсадли инвестициявий лойиҳалар ўрин олгани янада аҳамиятлидир. Жумладан, Нукус шаҳрининг ривожланиш нуқталари сифатида иккита дастурда драйвер соҳалар – қурилиш материаллари ҳамда озик-овқат саноатини тараққий эттириш юзасидан аниқ лойиҳалар белгиланди. Мазкур тармоқлар ўз навбатида ишлаб чиқаришда иқтисодий барқарорликни сақлашда муҳим омил бўлиб хизмат қилади.

Бундан ташқари, республика- мизда амалга оширилиши кўзда тутилган инвестиция лойиҳаларининг манзилли рўйхати тасдиқланган бўлиб, Нукус шаҳри кесимида жами 882,6 млрд сўмлик 181 лойиҳа амалга оширилади. Шунингдек, аҳоли турмуш шароитини янада яхшилашга қаратилган чора-тад- бирлар дастури ишлаб чиқилгани- нинг ўзи катта воқеалик эмасми? Қорақалпоғистон Республикаси бўйича жами 45 та, Нукус шаҳри бўйича 6 та маҳалла фуқаролар йиғинларида янгидан ташкил қили- наётган аҳолига хизмат кўрсатувчи ишбилармонлик субъектлари 2026 йил 1 январгача фойда, мол-мулк солиғи, кичик корхоналар айлан- масидан олиннадиган солиқ ва яқка тадбиркорларнинг маълум миқдор- даги солиқларидан озод қилинди.

Шу билан бирга, миллий валютада олинувчи кредитларнинг Марказий банкнинг асосий ставкасидан юқо- ри бўлган қисми ишбилармонликни қўллаб-қувватлаш фонди ҳисоби- дан компенсация тарзида тўланиши белгилаб қўйилди.

Нукус шаҳридаги юқорида қайд қилинган 6 та МФЙ ҳудудини обо- донлаштириш бўйича дастурда инжиниринг-коммуникация тар- моқларини яхшилаш, маъмурий биналарни реконструкция қилиш, уй-жойларни таъмирлаш, кўп қа- ватли хонадонлар олд йўлакларини тузатиш, тунги ёриткичлар билан тўлиқ таъминлаш, томлар ва фасадларни таъмирлаш, болалар майдончаларини барпо этиш, янги мактабгача таълим ташкилотлари қурилиши ва албатта, бандликни таъминлаш сингари вазифалар на- зарда тутилган бўлиб, бу соҳадаги ишлар аллақачон бошлаб юборил- гани қувонарли.

Инжиниринг-коммуникация ҳамда йўл-транспорт инфратузил- масини ривожлантириш масала- ларига ҳам алоҳида эътибор қарати- лмоқда. Мисол учун, қарорнинг 7-иловасида 2021-2023 йилларда маҳаллий бюджетнинг 675 млн. сўм- лик маблағи ҳисобидан Нукусдаги 9 километрлик ички хўжалик йўл- ларини таъмирлаш, Жаҳон банки- нинг 780,0 млрд сўмлик маблағи ҳисобидан ичимлик суви тармоғини тортиш ва модернизациялаш кўрса- тиб ўтилган.

Ҳар қандай давлат ривожда оила даромадининг тутган ўрни алоҳида аҳамиятга эга. Шу боис банд бўлмаган аҳоли қатламини иш билан таъминлаш қарорнинг асо- сини ташкил қилиб, 1639 янги иш ўринини яратиш режалаштирилгани эътиборга молик. Айниқса, “Темир дафтар”, “Аёллар дафтари”, “Ёшлар дафтари”га киритилган фуқаролар- га бандлик хизматлари кўрсатили- ши камбағалликни қисқартиришда муҳим омил ҳисобланади.

Хулоса қилиб айтганда, Прези- дентимизнинг бевосита раҳбар- лигида олиб борилаётган изчил ислохотлар, айниқса, кадрдон она шахримиз қиёфасини тубдан ўзгар- тириш, халқимиз фаровонлигини ошириш ҳамда аҳоли бандлигини таъминлашдек эзгу ишларга йўнал- тирилган бу каби саъй-ҳаракатлар худди пойтахтимиздагидек кенг кўламли касб этмоқда. Муболаға қилмайман, Нукусим ҳам Тошкент- дан кам эмас. Яхшиси, минг бора эшитгандан кўра, бир бора келиб кўринг, томоша қилинг, қачонлар- дир Оролбўйига келган бўлсангиз, бугун бу жаннатмонанд манзиллар- ни танимайсиз.

Зулфия СЕЙТНИЯЗОВА,
Халқ депутатлари Нукус шаҳар
кенгаши депутати

ЁЛҒОНГА ЎРГАТМАНГ

XXI ASR

Миллатимизнинг ўлмас шоири Чўлпон ҳазратлари “Халқ денгиздир, халқ тўлқиндир”, дея юрагидаги алам-ҳасратларини бор бўйича тўкиб ташлаган эди бир замонлар. Орадан қарийб бир аср ўтяпти ҳамки, яна шу халқ энди озод бўлди, эркимиз қўлимизда, мустақил давлатимиз, деб кўкрак кериб, бутун дунёга мақтаниб юрган бир маҳалда янги – 2021 йил оғир синовлар билан бошланаётгани кўнгилга гашлик солаяпти. Ўтган йилнинг, ердан чиқдим, осмондан тушдим, номаълум ҳамон, коронавирус деган балою-қазонинг аччиқ асоратлари тугар-туғамас, юртдошларимизни айни қиш чилласида янада мушкулроқ турмуш заҳматлари кутиб турган эканми ё?

Тўғрироғи, гап 4 январдан бошлаб мамлакатимизнинг қатор ҳудудлари, аввало, Қашқадарё ва Сурхондарё вилоятларида энергетика тизимида рўй берган жиддий узилишлар ҳақида кетяпти. Менга ўша куни Китоб туманидан синфдошим қўнғироқ қилиб ёзғира кетди: “Аввалроқ, қиш арафасида кунлар сал-пал совиб келаётган маҳал пеш эмасди-ку, лекин совуқ роса забтига олаётган кунларда, яъни кеча саҳарда свет ўчувди. Бирор кор-ҳол рўй бергандир, ёниб қолар деб пешингача кутдик. Ёлғонмас, бир-икки марта липиллаб кўйдим. Кейин умуман йўқолдим. Хайриятки, қишлоқда яшаймиз, оз-моз ўтин, таппи ғамлагандик. Битта хонада ҳаммамиз жон сақлаяпмиз. Ўн кунча бўлди, ҳаво шу даражада совуқки, анави “Ахборот”даги об-ҳавочиларнинг маълумоти ҳам фирт ёлғон...”

Шу заҳоти ижтимоий тармоққа чироқсиз яшаш азоб эканлиги ҳақида кичкинагина изоҳ қолдирдим. Хоҳ ишонинг, хоҳ ишонманг, юртимизнинг турли бурчакларида яшаётган юзлаб таниш-беғона кишилар бу мавзуга оид дардларини дастурхон қилишиб кетишди. “Шаҳрисабз марказида қурилган 4 қаватли уйда яшаймиз, эрталабдан бери чироқ йўқ, домчилик, ўтин, печка куриб бўлмас. Қалин кийиниб, ёш болаларимни кўрпага ўраб зўрға ўтирибмиз”, деб ёзди Маъруфжон исмли йигит. Бойсунда яшайдиган Исмоил ака деган чорвадор фермернинг дийдиёсини ўқинг: “Эсимда, ўтган йил ёз ойи охирида Сурхондарёда умуман светсиз, телевизорсиз яшаётган қишлоқ борлиги ҳақида шов-шувлар тарқалганди. Ҳозир келиб кўришсин, деярли ҳамма қишлоқларда аҳвол шундай, амал-тақал қилиб кун кечиряпмиз. Бу аҳволда болаларимиз қандай таълим олади, мактаблар ҳам музлаб ётибди. Интернет зўр, деб мақтанишди яна Тошкентда ўтириб олган каттаконлар. Қани, бирор марди бўлса шу кунларда бизнинг тоғли қишлоқларга келиб яшасин икки кунгина, кўрадиганини кўради-я!”

“Дарё” сайтида эълон қилинган “Ўзбекистон бўйлаб электр таъминотида юзага келган носозлик бартараф этилаётгани маълум қилинди”, деган хабарчага кўзим тушди:

“Ўзбекистонда 4 январь куни электр энергияси таъминотида узилишлар кузатилмоқда. Энергетика вазирлиги юзага келган муаммо соат 23:00 га қадар бартараф этилишини маълум қилди.

Қайд этилишича, соат 06:59 да ва 10:10 да “Муборак нефть ва газ қазиб чиқариш бошқармаси”га қарашли нефть ва газ қазиб чиқариш конларини электр энергияси билан таъминлаб турган “Нефтчи” подстанциясидан чиқувчи Л-Зеварда

1-, 2- электр узатиш тармоқлари реле ҳимоясидан ўчган.

Оқибатда электр энергиясини ишлаб чиқарувчи иссиқлик электр станцияларига етказиб берилган табиий газ соатига 140-175

Бизда энергетика тармоғи ривожланмас экан, фақат яшаш учун кураш давом этаверади холос. Тараққиёт, маданият, маънавият деган тушунчалар иккинчи даражага тушиб қолади. Бир ҳафтадан кўп бўлди, воҳамизда



минг метр кубга қисқарган. Бунинг натижасида электр энергияси таъминотида республика ҳудудлари бўйлаб 600-800 МВтгача чекловлар кузатилмоқда.

“Ушбу юзага келган носозлик махсус бригада томонидан соат 12:15 да бартараф этилиб, Зеварда, Жанубий Кемачи, Жанубий Ўртабулоқ, Денгизкўл, Самонтепа сиқув компрессор станцияларидаги газ ҳайдаш агрегатлари қайта ишга туширилмоқда. Натижада магистрал газ қувурларига етказиб берилган табиий газ сарфи қайта тиклана бошлади”, дейилганди хабарда.

Аввалига соат роппа-роса кечкурун 23 да Чироқчида яшаётган бир танишимдан чироқ ёндим, деб сўрадим. У ҳам 4 январь куни кечроққа бориб, бир-икки марта ўчиб-ёнганини айтди. Фузор туманидаги 9-умумтаълим мактаби ўқитувчиларидан бирининг айтишича, кундузи соат 11 ларда ўчган чироқ кечаси тўққизлар атрофида ёнган, лекин дарс ўтиш имконияти деярли бўлмабди. Муболағамасу, аммо ҳар куни аҳвол шундай, деди муаллим. Қашқадарё вилояти маркази Қарши шаҳрида яшовчи тадбиркор Бахтиёр Тўраевнинг изоҳ беришича, бу ерда электр таъминотида узилишлар кам экан...

Қашқадарёлик филолог-ўқитувчи Ашраф Адинаевнинг ушбу фикрларига алоҳида эътибор қаратишингизни сўрайман:

“Мантқиқий савол: ким кўп кечирим сўрайди? Албатта, муттаҳам, каззоб ва ўғрилар. Бундан 4-5 йил аввал кечирим сўраш у ёқда турсин, ҳатто халқни менсимас эди бу ташкилот.

булдурик-совуқ ҳаво оқими ҳукмрон. Сув трубалари музлаши ҳамда электр токи йўқлиги боис сув ҳам муаммо. Табиий оқма газдан-ку Китоб туманимиз умидини ҳам узган, менимча. Газ баллонни ҳам бир ойга эплаб, тежаб ишлатиб бўлмаяпти. Кимга, қаерга мурожаат қилишни ҳам билмайди киши. Чунки кечирим сўраб турган (айбдордан) тизимдан қандай қилиб нажот сўраймиз? Президентимиз: “Янги Ўзбекистон — мактаб остонасидан, таълим-тарбия тизимидан бошланади”, дея таълим соҳасида ислохотлар олиб бораётган бир пайтда, энергетикамиз ҳамон эскича қолиплардан воз кечолмаётгани ачинарлидир.

Икки кундан буён “Ўзбекистон тарихи” телеканалидан хаттотликка оид Навоий “Хамса”ларининг китобатига доир кўрсатувни кутиб келаётгандим. Бир соат ичида уч маротаба чироқ ўчди. Бунақа кечирим сўрашлик кулгилимасми? Хўш, энергетика тармоғида содир бўлаётган носозликка нималар сабаб бўляпти? Муаммоларнинг қачон, қайси ҳудуд, қандай ҳолатда ва қай тарзда бартараф этилганлиги ҳақида аниқ, жўяли ахборот тарқатиб, аҳоли норозилигини бартараф этиш наҳот шу даражада қийин бўлса?! Аҳоли қачонгача бундай оғир ҳолатда кун кечирини мумкин?

Хорижда бу масала қандай ҳал этилган дейсизми? Россиянинг Чита ва Нерчинск шаҳарларида шахсан ўзим гувоҳи бўлган вазиятни мисол қилиб келтираман. Кул рангли кўк чизиқли фургондан бир нечта кўк костюмдаги энергетика ходимлари қўлларидан қоғозларни хонадон

эшиқларига ёпиштириб кетишди. Бориб ўқисам, эртага соат 11.00 дан 11.20 гача тармоқда юзага келган носозлик учун узилиш бўлади, деб ёзилган. Бу ўн-ўн беш йил аввалги вазият. Ҳозирда эса вилоят телевидениеси орқали қайси туман ёки ҳудудда қачондан қачонгача, нима сабабдан узилиш бўлишини бир кун олдин ёки ўша куни телеэкран пастида “беғущий строк” лар билан огоҳлантиришади.

Бизда-чи, “беғущие люди” — одамлар нима қилиши, нима дейишини билмай сарсон-саргардон. Такли-

фим, дунёнинг қайси бир чеккасидаги бўлар-бўлмас ахборотларни, беҳуда, бемаъни нарсаларни томоша қилгандан кўра, ўз юртимиз билан ҳамнафас яшаганимиз маъқул эмасми?”

Тележурналист Жўра Боборахматовнинг айтишича, Чироқчи туманидаги Чияли қишлоғида ҳам янги йилдан кейин электр умуман ёнмаётган экан. Ҳатто мол-ҳолларнинг суғоришга сув йўқ, дейишибди чиялликлар. Музлаган сувни ичган қўй-қўзилар нобуд бўлаётгани ҳақида ҳам ташвишли хабарлар келяпти, дейди ҳамкасбим.

Аён бўлишича, газ ва чироқсиз яшашга маҳкумлар асосан қишлоқ аҳолиси эканлиги янада аянчлидир. Ана энди вазирлик тизимидагилар қандай баҳоналарни тўқишлари мумкин? Устига устак, Энергетика вазирлиги уялмай-нетмай ноқулайликлар учун истеъмолчилардан узр сўраши ортиқча эмасми? Булар кимнинг устидан кулишяпти? Тагин яна айрим казо-казолар оддий одамларнинг электр энергиясидан қарздорликлари туфайли тизимда шундай кутилмаган узилишлар бўлаётгани ҳақида айюҳаннос солаётгани-чи? Йил ўтиб-ўтмай шаҳарларни қўяверинг, олис-яқин қишлоқлардаги электр ўлчагич асбобларини пайпоқ сингари алмаштиравериш қачонгача давом этади? Нима, оддий халқ сизнинг бундай “ўйин”ларингиз ортида нималар ётганини билмайди деб ўйлайсизми?

Ўтган йилнинг 21 декабрь куни Бош вазир Абдулла Арипов раҳбарлигида иқтисодий тармоқлари, кўп квартирали турар жойлар ижтимо-

БИЗНИ!

ий соҳа объектларини қиш мавсумига тайёрлаш ва мавжуд муаммоларни бартараф этишга бағишланган йиғилиш бўлиб ўтганлиги ҳақида ахборот тарқатилган ва ана шу йиғилишда Қашқадарё вилояти ҳокими Зойир Мирзаев **“Вилоятимизнинг Фузор, Чироқчи, Қамаш, Шаҳрисабз ва Китоб туманларида электр энергияси таъминотида 8-12 соатгача режасиз узилишлар кузатишмоқда. Натижада аҳоли томонидан ҳақли эътироз ва норозиликлар кўпаймоқда. Сабаби, ушбу ҳудудларда кўпчилик аҳоли тоғли ва қишлоқ**

қўнғироқ қиляпти, маҳалла оқсоқоллари, кексалар, аёллар ҳокимликка келяпти нажот истаб. Энг ташвишланарлиси, шаҳар марказида қурилган намунали ҳовлилар ва кўп қаватли уйларда яшаётганларга жуда оғир бўляпти. Қишлоқларда ҳам аҳвол бундан-да чатоқ.

Яна бир даҳшатли томони шуки, биласиз, Ўзбекистонда Қашқадарё ва Сурхондарёнинг тоғли ҳудудларида ўрмонзорлар, яшил зоналар, экологик тоза майдонлар кўп. Шу вақтгача аҳоли имкон қадар қиш мавсумига ўтин ғамлашда қийналмасди. Лекин бу йилги қаҳратонда



жойларда яшайди”, дея бу борада амалий кўмак сўрагани. Кўтарилган муаммога Бош вазир алоҳида эътибор қаратиб, 2 кун ичида вазиятни ўнглашга, режасиз 8-12 соатлаб узилишларни бартараф этиш бўйича масъулларга топшириқ берганлиги кўпчиликни қувонтирган эди. Табиийки, шундан сўнг аҳвол ижобий томонга ўзгарганлиги ҳақиқат. Лекин орадан кўп ўтмай, очиги, янги йилнинг илк кунлари яна Қашқадарё ва Сурхондарё вилоятларининг кўпгина туманларида электр тизимида узлуксиз узилиш бошлангани ҳақида ачинарли хабарлар тарқалди.

Сурхондарё вилоятининг Қизирик, Бандихон, Ангор, Музработ туманларида ҳам аҳвол бундан бешбаттар. Ҳар кун ичида кечки овқат пайти ўчириб ташланмоқда. Айниқса, Қизирик туманидаги “Истара”, “Кунчиқиш”, “Яккатерак” маҳаллаларида қиш бошлангандан буён электр чироғидан юрак ўйноғи бўлиб қолдик, дея ёзади шу қишлоқларда яшовчи ўнлаб фуқаролар. Мана сизга мамлакат энергетика тизимининг аҳволи. Ҳатто оддий ичимлик суви ва табиий газ, электр токи бўлмаса... зимистон қиш кечаларидаги аҳволни бир кўз олдингизга келтиринг-а!

Бундай оғриқли дарду ҳасратларни қоғозга туширишдан юрак оғриб, мақоламизга сўнги нуқта қўйилаётган маҳал, 5 январь кундузи соат учда Китоб туман ҳокимлиги билан боғландим. Мутасаддилардан бири шундай изоҳ берди: **“Афсуски, бу муаммонинг ечимини тополмаяпмиз. Кечаги вазирлик ахборотидан бўлак ҳеч қандай жўяли маълумот йўқ. Вазирликка неча марта боғланишга уриндик. Фойдаси бўлмапти. Одамлар 4 январь чироқ ўчганидан бери тинимсиз**

жабрланаётган одамларга мўмайгина даромад топишни кўзлаётган олғирлар тоғ ёнбағирларидаги кўп йиллик арчалар, дўланалар ва бошқа энг фойдали дарахтларни шафқатсизларча кесиб, фалон пулга сотиб юбормаслигига ким кафолат беради? Ҳозир айримлар имконсизликдан ўз ҳовлисида ташқарига чиқиб, боғлар ва кўча-кўйлардаги қаровсиз тут ва бошқа мевали дарахтларни ҳам ўтинлик учун кесиб, чоғиб кетиш ҳоллари учрапти. Оқибатда экологик таназзулга юз тутамиз бу аҳволда...”

Биламиз, бошқа уч фаслда ҳам ҳар қандай қийинчилик ва мушкулликларни мардона енгиб келаётган халқимиз айна қишли-қировли шу кунларда дуч келаётган оғриқли муаммолари ва жавобсиз қолаётган айрим саволларига ечим излаш битта вазирлик ва бошқа мутасаддилар қўлидан келмаслиги аён. Лекин ташқарида қилич қайраб турган қиш фаслининг ўтишини турли хил қуруқ, ёлғон ваъда, ваз-корсонлар билан кутиб турганларга айтар сўзимиз битта: Президент қайта-қайта таъкидлаб чарчамаётган халқни рози қилишдек муқаддас бурч ва вазифани уудалай олмасангиз, катта қарвон йўлига чиқаётган юрт тараққиётига тўғаноқ бўлманг, ишончли оқлолма-япсизми, марҳамат қилиб ўрнингизни бўшатиб қўйинг. Илтимос, ўзингизни ҳам, бизни ҳам беҳудага қийнаманг. Шоир куйиниб ёзганидек, ёлғонга ўргатманг бизни!

Норқобил ЖАЛИЛОВ,
Ўзбекистонда хизмат кўрсатган журналист

Манба: “Хуррият” газетаси,
6 январь, чоршанба

Мактаб ҳудудида... кўп қаватли уй қурилиши мумкинми?

Андижон шаҳар халқ таълими бўлимига қарашли 19-умумтаълим мактаби айна кунда муҳокамалар марказида. Нега дейсизми?

Таълим муассасасининг очик спорт майдонига тадбиркорлар томонидан кўп қаватли уй-жой қурилиши режалаштирилмоқда. Минг таассуфки, тегишли мутасаддилар бу ҳолатга ҳалигача етарлича муносабат билдирма-яптилар.

Қизиқ, бир ўйлаб кўринг. Мактаб тасарруфидаги майдонда ҳам таълим маскани, ҳам аҳоли уй-жойлари... қаранг-а, қандай “уйғунлик”!

Аслида бу ҳолатга изоҳ бериши шарт бўлган масъул идораларнинг жимгина, томошабин бўлиб, сукут сақлаётгани балки ризолик аломатидир. Лекин эртага бундай лоқайдлик жуда қимматга тушиши ҳақида ҳеч ким ўйламаётгани галати.

Дастлаб мазкур мактаб ўқувчиларининг ота-оналари томонидан йўлланган мурожаатда таълим масканига қўшимча ўқув биноси қурилиши зарурлиги ва бунинг учун амалий ёрдам берилиши

қурилишига изн берилиши тўғримики? Кўр-кўрона очик спорт майдонига арзон деб аталаётган замонавий уй-жойларнинг қурилишидан мактабга не наф? Бунинг ўрнига таълим муассасасининг бир-бирига уланиб кетаётган муаммоларини ҳал этишга вақт ва маблағ сарфланса бўлмайдими?

Мазкур муаммонинг ечими хусусида ўтган 2020 йилнинг 10 декабрь куни халқ депутатлари Андижон шаҳар кенгашининг ўн учинчи сессиясида ҳам бир ноиб сифатида ўзимнинг ҳолисона муносабатимни билдирган эдим. Лекин бу масала ҳамон очик қолаётгани турли жумбоқли саволларни ўртага чиқармоқда.

Мамлакатимизда ёш авлодни билимли, салоҳиятли ва замон талабларига мос этиб тарбиялашга, ўқувчиларнинг бўш вақтларидан унумли фойдаланиш, тўғарак машғулоти ва қўшимча дарслар ўтиш ишларини юқори босқичга кўтаришга катта эътибор



сўралган эди. Бу масала бўйича Андижон шаҳар ҳокимига юборган депутатлик сўровим, албатта, натижасиз қолмади. Муаммо тегишли масъуллар иштирокида ўрганганлигидан қувондик. Урганишлар 19-умумтаълим мактабининг 570 ўринга мўлжаллангани, бироқ айна вақтда масканда 1минг 300 нафар ўқувчи таълим олаётганини кўрсатди. Бу эса амалдаги қонунчиликда белгиланган ўринлар меъёридан 2.4 баробарга ортиқ деганидир. Бунинг устига мактабда синфхоналар етишмайди. Мана сизга муаммоларнинг қалашиб ётганига исбот!

Бироқ юзага келган айна муаммони ўз вақтида бартараф этиш ўрнига айрим “ишбилармонлар”нинг манфаатлари учун таълим даргоҳи ҳудудидан ўзбошимчалик билан фойдаланиб, кўп қаватли уй

берилаётган бир пайтда айрим қурувчи-тадбиркорларнинг бундай “кутилмаган лойиҳалар”ни амалга оширмаққа бел боғлагани шу ҳудуд аҳлини ўйлантириб қўймоқда?

Ёки саволни бошқачароқ қўйсам балки ўринли бўлар: Андижон шаҳрида қурилиши режалаштирилаётган, нархлари арзонлиги қайта-қайта таъкидланаётган кўп хонадонли уйларни қуриш айрим жойларда мана шундай мактаб, боғчалар жойлашган ҳудудларга қурилаётгани ҳисобигамики?..

Ушбу қурилиш ишлари шаҳар-созлик меъёрларига қай даражада тўғри келади?!

Андижондаги мутасаддилардан бу каби саволларга жавоб кутаман.

Шухратбек КАРИМОВ,
Халқ депутатлари Андижон шаҳар кенгаши депутати

Соҳиба Худойбердиева

Андижон вилояти Балиқчи туманида туғилган. 1999 йилдан буён тадбиркорлик билан шуғулланади.

“Коинот” фермер хўжалиги раҳбари.

2018 йилда “Шуҳрат” медалига сазовор бўлган.

Пандемия даврида кам таъминланган аҳолини моддий ва маънавий қўллаб-қувватлашда кўрсатган хизматлари учун “Меҳр-саховат” кўкрак нишони билан тақдирланди.

“Ишбилармон аёл – 2020” республика кўрик-танлови ғолибларидан бири.



Машаққатлар

одамни кучли қилади

XXI ASR

Аёл киши учун уй, рўзгор ишларининг ўзи катта масъулият. Тонгдан тунга қадар тугамайдиган юмушлар, оила юки, фарзанд тарбияси... Эҳ-ҳе, у ёғини ўзингиз ҳисоблайверинг. Қисқача айтганда, қуёш тинса-да, ой тинса-да тинмайди ўзбек аёли! Ҳатто чарчоғини-да оиласида, меҳнатда ёзади.

Бу кундалик вазифалар балиқчилик Соҳиба опа учун юмушларнинг бошланиши холос! Қолгани шундан сўнг. 60 гектарли фермер хўжалиги, “Камалак” хусусий боғчаси, туман марказидаги тикув цехи, аёллар гўзаллик салони ҳамда автомобилларга техник хизмат кўрсатиш шохобчасидан хабар олмаса, кўнгли жойига тушмайди. Турли жойлардаги объектларни бошқариш, иш фаолиятини самарали ташкил этиш, иш сифатини сақлаб қолиш... айтишга осон, аслида жуда мушкул. Яна шунда ҳам кулиб турган кўзлар, самимият ва шукроналик уфурган сўзлар билан қарши олади сизни.

– Синглим, пандемия мен учун катта мактаб бўлди, – дейди Соҳиба опа шунча ишга қандай улгурасиз, деган саволимга жавоб берар экан. – Бувиларимиз қулоғимизга кўрғошиндек куйиб кетган “уф” тортма, деган насихат-танбехларининг мағзини обдон чақиб кўраман доим. Юриб турган оёғимизни қадрласак, иш бажараётган қўлларимизни кўзимизга суртсак, юрагимизнинг ҳар товушига бир шукр этсак кам аслида. Карантинда яқинларимизни ҳам бағримизга боса олмай, жонимизни ҳовучлаб, эшикдан чиқолмай қолганимизда эртадан кечгача далада меҳнат қилиб ўтган кунларим ҳолвадек туюлди. Ўлмасам, тўхтамай, нолмай ишлайман деб сўз бердим ўзимга (кулади).

Яна англадимки, инсон биринчи навбатда ўз саломатлигига эътиборли бўлиши керак экан. Тинч ҳаётимизнинг шукронаси сифатида меҳр-муруватли бўлиш, саховатни унутмасликни ўргатди.

Бир нарса мени қувонтирдики, ўзбек халқи ўзининг меҳр-оқи-

батлилигини мана шундай оғир кунларда яна бир бор исботлади. Халқимиз жипс-лашди, бир-бирини



қўллаб-қувватлашга ўрганди, бағрикенг инсонларнинг кўрсатган меҳр-муруват ва кўмаклари айрим хасисларга намуна бўлди. Президентимизнинг ана шундай саховатпеша юртдошларим қатори менга ҳам “Меҳр-саховат” кўкрак нишони ҳадя этгани ҳеч бир ишимиз давлат, ҳукумат эътиборидан четда қолмаслигини яна бир бор англатди.

– Фермерлик аёл кишига мушкул эмасми?

– Асло! Ахир онамизнинг қўлидан эмаклар тушганимиз шу ер, гул эканимиз, райҳон уруғи сепганимиз шу ер, баҳри дилимизни очган, тотли неъматлар ҳадя этган ҳам. Болалиқдан тараганимиз, қараганимиз ҳам ер. Фермерлик – шу меҳнатларнинг катта ер майдонида бажарилиши холос. Ерни вақтида тайёрлаб,

уруғни вақтида қадасанг, ҳар бир тадбирни кечиктирмай бажарсанг, у сендан меҳрини аямайди. Заминнинг табассуми – ҳосил, баракадир!

Она замин алдамайди. Ишона-

ларга, хўжалигимиз аъзоларига улашдик.

Хуллас, йилнинг тўрт фаслида ҳам турли қишлоқ хўжалиги маҳсулотларини етиштириб, бозорни таъминлаб турамыз.

– Тикув корхонангизда спорт анжомлари тикилар экан?

– Сўнги пайтларда юртдошларимизнинг спортга қизиқиши янада ортган. Фарзандларини соғломлаштириш, чиниқтириш масканларига етаклаб кетаётган ота-оналарни кўп кўраман. Шуларни кузатиб, спорт анжомлари тайёрлашни мақсад қилдик. Спортчиларимиз катта марраларни эгалаганда биз ҳам қувониб, гурурлансак дейман. Корхонамизда меҳнат қиладиган 12 нафар моҳир тикувчининг ҳам ниятлари шу. Маҳсулотларимизни ички бозордан ташқари кўшни Қирғизистонга ҳам экспорт қиляпмиз.

Бу соҳага ўзимнинг ҳам қизиқишим катта. “Бунёдкор аёл”, “Ишбилармон аёл” кўрик-танловларидан ташқари “Аёл соғлом бўлса, оила соғлом ва мустақкам бўлади” шиори остида ўтказилаётган спорт мусобақаларида жамоамиз билан фаол иштирок этиб келяпмиз. Кубокларимиз ҳам талайгина.

– Хўш, шунча машаққатларни енгиб ўтибсиз, улар сизга нима берди?

– Бу мушкулотлар, ҳаёт синовлари шахсан менга куч-қувват, янги-янги ғоялар туғилишига туртки, ўзига хос руҳ, далда берди. Машаққатлар одамни чиниқтиради, пиштади, атрофга теранроқ қарай бошлайсиз. Ёнингда яхши одамлар кўплигини ҳис қиласиз. Ва қўлдан келгунича меҳр-муруватли бўлмоққа интиласиз.

“XXI asr” мухбири Нурхон ЭЛМИРЗАЕВА суҳбатлашди.

Мамлакатимизнинг аксар катта шаҳарларида мева-сабзавотлар қимматлашиб кетаётганидан нолимаган одам йўқ ҳисоби. Баъзилар эса бу ҳолдан ҳайрон. Ҳақиқатан ҳам нега серқуёш, ерига чўп суқса кўкарадиган, деҳқону боғбонлар дарахт баргларида ҳам кўп бўлган ўлкамизда меваю сабзавотлар сув текин бўлиб кетмайди? Ҳеч ким жавоб сифатида ягона сабабни айтолмаса керак. Чунки сабаблар бисёр. Ва улар ичида энг асосийларидан бири, назаримизда, кўпгина жойларда фермерларимиз лозим даражада қўллаб-қувватланмаётгани, ҳақ-ҳуқуқлари назар-писанд қилинмаётганидир. Шундай дейишга асос борми ўзи? Бор.

Мана, масалан, Моҳидил Алимардоновани олайлик. У ғаллачилик ва мева-сабзавотчилик билан шуғулланаётган минглаб фермерларимиздан бири. 2019 йили Қибрай туман кенгашига О'zLiDePдан депутат этиб сайланган. Мазкур тумандаги "Шарқ-Моҳинур" фермер хўжалигини 14 йилдан бери бошқаради. Мулкдор бўлган илк даврларда не-не мушкулотларга рўбарў бўлмади, дейсиз. Дала машаққатлари,

Ўзимиз ўтирган шохни Ўзимиз кесмайлик!



Фермер, депутат Моҳидил Алимардонова

Фермернинг Яккасарой туманидаги растаси

дан дўкон қуриш учун рухсат олиб бўлмади. Қишлоқ мулкдори туман (собик) ҳокимига қайта-қайта мурожаат қилди. Ҳар сафар ҳоким "бошқа жойдан ер ажратиб берамиз, сабр қилиб туринг" деб, унинг қўйини пуч ёнғоққа тўлдириб жўнатаверди. Бу орада ўша 4 сотих ер аллақимларга меҳмонхона қуриш учун берилди (ернинг янги эгалари қурилиш тақиқланган жойга қандай қилиб бино тиклашди, буниси бизга қоронғу). Фермер бундан меҳмонхона битаёзган пайтдагина – 2014 йили хабар топди. Хужжатлар билан ҳам, фермер хоҳиши билан ҳам ҳисоблашилмаган, ер шартта олиб қўйилган, вассалом. Бошқа одам, балки, бу ишдан кўнгли совиб, қўл силтаб кетган бўларди. Лекин Алимардонова қийинчиликларда тобланган аёл эмасми, таслим бўлмади. 2018 йил аввалида Яккасарой тумани Бошлиқ кўчасидаги Армуғон маҳалласида қишлоқ хўжалик маҳсулотлари сотиладиган раста қуришга эришди. Бирок, раста – растада. Мева-сабзавотлар ёзда сўлийти, қишда совуқ уради. Фермер 20 кв.м. лик пештахта ўрнида девори ойна ва пластикдан иборат, ихчамгина дўконча қуриш учун ҳокимликдан рухсат олиш учун роса елиб-югурди. Кўп марта чора истаб борса-да, туман ҳокими ўринбосари (собик) Ойбек Дониёв қабул қилмайди, ёзма мурожаатларига жавоб қайтармайди. Фақат бир марта растага келади ва ҳоким бу жойни бошқа одамга ваъда қилганини айтиб, аёлни шаштидан қайтармоқчи бўлади, савдони тўхтатишни талаб қилади. Уз навбатида фермер раста яқинидаги озиқ-овқат дўконларига ишора қилиб, "Хўш, булар кимдан рухсат олган?", дейди. Ўринбосар жаҳли чиқиб, бошқалар билан ишингиз бўлмасин, дея зарда қилади... Бир неча кун ўтгач – 2019 йил 1 июнда яна келиб, фермер хўжалигининг савдо билан шуғулланаётган ходимларини жарима солиш, қаматиш билан қўрқитиб, ҳайдаб юбо-

ради. Шундан кейин фермер "Ахир, барибир қонунлар мен томонда-ку" дея дўконча қуришни бошлади. Ҳоким ўринбосари уни буздириб ташлайди. Шу хатти-ҳаракати билан у яна бир қонунбузарликка йўл қўяди: Шаҳар-созлик кодексининг 20-моддасига биноан тадбиркорлик субъектларининг шаҳарсозлик фаолиятини чеклаш, тўхтатиб қўйиш ва тақиқлаш фақат суд тартибида амалга оширилиши белгиланган. Савол туғилади: фермер – тадбирқорми? Албатта. "Фермер хўжалиги тўғрисида"ги қонунга кўра, фермер хўжалиги қишлоқ хўжалиги маҳсулотларини етиштириш ҳамда қонун ҳужжатларида тақиқланмаган бошқа фаолият турлари билан шуғулланувчи тадбиркорлик субъектидир. Шунингдек, мазкур қонунга мувофиқ фермер хўжалиги маҳсулот етиштириш билан бирга уларни сақлаш ва реализация қилиш ҳуқуқига ҳам эга. "Тадбиркорлик фаолияти эркинлигининг кафолатлари тўғрисида"ги қонуннинг 34-моддасида давлат органлари, бошқа ташкилотлар ҳамда уларнинг мансабдор шахслари тадбиркорлик субъектларининг қонун доирасида амалга ошираётган фаолиятига аралашига ҳақли эмаслиги баён қилинган. Ушбу ҳужжатда, шунингдек, давлат бошқаруви органлари тадбиркорлик субъектларига ўз товарларини (ишларини, хизматларини) ташқи ва ички бозорларда реализация қилишда кўмак бериши лозимлиги ҳам назарда тутилган. Бинобарин, қишлоқ мулкдори ўз қонуний ҳаққини талаб қилди – туман ҳокимига (собик) қайта-қайта ёзма равишда мурожаат этди. Жавоб бўлмади. Кўп уринишлардан сўнг, 2019 йил 8 августда хўжалик юристи билан бирга амаллаб ҳоким қабулига кирди. Туман раҳбари уларни эшитишни ҳам истамай, кабинетидан қувиб чиқарди...

Ҳайрон қоласан киши, юрт маъмуричилиги, тўкин-сочинлик, арзончиликда фермер қандай ўрин тутишини ҳеч ким

англамаса ҳам, ҳоким яхши тушуниши керак эди-ку!

Кейинги йили туманга янги ҳоким тайинланди. Архитектура, капитал қурилиш бўйича ҳоким ўринбосари ҳам ўзгарди. Муҳими, Президентимизнинг тадбиркорларга янада кўпроқ имкониятлар, қулайликлар яратишга

йўналтирилган навбатдаги фармон ва қарори эълон қилинди. Давлатимиз раҳбарининг 2020 йил 8 июндаги ПҚ-4742 сонли қарори ҳамда 2020 йил 20 июлдаги ПФ-6029 сонли фармони фермеримизга янги умид бағишлади, далда бўлди. Бирок ҳокимликнинг унга муносабати эскилигича қолди. Тўғри, мутасаддилар унга ён босгандек бўлишди. Фермерга товуқ катагидек келадиган, "енгил типдаги", яъни омонатгина, энг ёмони – кейинчалик бузилиш эҳтимоли юқори бўлган бир дўкончани 250 млн. сўмга сотиб олишни таклиф қилишди. Турган гапка, Моҳидил Алимардонова бунга кўнмади. Яна ҳокимликка келганида унга айтишдики, "юқори"дан наманганлик фермерлар рўйхати туширилган, улар учун туманда дала дўконлари қуриляпти, бошқа фермерларга рухсат йўқ ҳозирча... Ажаб, Тошкент қайда-ю, Наманган қайда? Пойтахтнинг шундоққина биқинида маҳсулот етиштираётган ер эгаларига йўл очиб бериш, ҳам сотувчи, ҳам харидор, умуман, барча учун мақбул эмасми?

Ўн кун аввал фермер туман ҳокимлигидан хат олди. Унда М.Алимардоновадан мева-сабзавот растаси фаолиятини дарҳол тўхтатиш, пештахта ва соябонни олиб кетиш талаб қилинган. Ушбу талаб меъёрий ҳужжатлар билан асосланган.

– Хатда мулк ҳуқуқи эътироф қилиниши, яъни менга дўкон учун бир парча ер ажратилиши ҳокимлик ваколатига кирмаслиги баён этилган, – дейди фермер. – Қизиқ, қуриляётган дўконни бузишга ваколати бор экан-да. Қолаверса, шаҳарда кўплаб фермерларнинг дала дўконлари ишлаб турибди. Буни қандай изоҳлаш мумкин? Тошкент шаҳар давлат солиқ бошқармаси ва Тошкент шаҳар ИИББнинг қўшма фармойиши ҳам рўқач қилинапти. Аммо менинг на солиқ, на бошқа масалада тилим қисий жойим йўқ. Қисқаси, қонунлар ишламаслигига, устига-устак, баъзи нормалар бир-бирига зидлигига яна дуч келдим, бунинг алами, оғриги танамни зирқиратяпти.

Фермер айтаётган гаплар янгилик эмас. Хусусан, Олий Мажлис Сенати раиси Танзила Норбоева 2019 йили бўлиб ўтган бир йиғилишда шундай деди: "Бизнинг қонунчилигимиз "бардак" аҳволга келиб қолган. Жамият учун керакли қонунлар қабул қилинади. Лекин кейин бирон-бир вазирлик ёки идора қонуности ҳужжатини шунақа "чиройли" ишлаб чиқадики, натижада ўша қонун ишламайди. Бир-бирини инкор қиладиган қонунлар ҳам жуда кўп".

Хуллас, нима бўлганда ҳам, ҳар қандай вазиятда ҳам фермерни қўллаш даркор. Президентимиз айтганларидек, деҳқон бу – ҳаётнинг бақувват устуни, тирикликнинг мустақкам таянчидир. Ўзимиз ўтирган шохни ўзимиз кесмайлик!

Беҳзод ИСРОИЛОВ,
"XXI asr" мухбири



Агар бир-икки мартагина эшитганимда эди, бу мавзуда ёзмай қўя қолардим. Ҳа энди-и, гуруч курмаксиз бўлмайди, йўл нозирларининг ҳайдовчиларни чув тушириши кунда-шунда ҳодиса эмас, уч-тўрт тирақи ҳамма соҳада учрайди, деган хаёл голиб келди аввалига.

“Метангаз”га турнақатор навбат кутиш бир томондан шопирларнинг фойдасига ишлади, десам ишонарсиз. Нега десангиз, у ёқдан-бу ёқдан гап сотиб, фикр-тажриба алмашдилар. Айниқса, аввалги “гаи”чи, ҳозирги ЙПХларга қарши бир ёқдан бош чиқариб “курашиш” ҳақидаги чақириқлар жўшқинлиги унча-мунча партияларнинг сайловолди тарғибот тадбирларида ҳам учрамаслиги ажабланарли эди. Бунақа норасмий “ўқув-тренинг”ларнинг самарадорлигини айтмайсизми яна. Ана шундай гурунглardan бирида ЙПХ ходимлари хизмат планшетида алдаб бармоқ бостириб олаётгани ва ўзбилгича жарима ёзиб юбораётгани ҳақида жиддий огоҳлантирилдик. Аввалига ишонмовдик.

Ижтимоий тармоқларда ҳам шопирлар фирибгар “гаи”чилардан ёзғирганига кўзим тушган, лекин эътибор қилмагандим. Бу дунёда кимам ўзини аҳмоқ ё ноҳақман дейди?! Иккинчи марта, мана, тирик гувоҳлардан эшитиб, бир сергак тортдим-у, бошинга тушмагунча билмас экансан барибир.

Хуллас, газетамиз чиқадиган куни (9 декабрь эди) ишдан кечроқ қайтаётгандим. Шота Руставели кўчасидан Муқимий кўчасига қайрилишда, қийшиқ кўприкнинг тагида ЙПХнинг қизил таёғи ишорасига кўра ўзим ҳайдаб юрган, тахририятимизга қарашли давлат рақами “748 DBA” бўлган Нексия машинасини четга олдим.

Нозир ҳужжатларни текшириб, бирор айб тополмагач, планшетини ишга солди. Дабдурустан “Машиналари тоқамиз”, деб қолди. Нега? Унинг айтишича, 30 май куни расмийлаштирилган жаримани тўламасдан қочиб юрган эмишман. Формалининг психологик ҳужумидан, халқона қилиб айтганда, пшак дўқидан оёғим қалтираб қолиши керакмиди? Дарҳол чўнтак ковлашга тушишим

Йўлдаги ёлғончилар

ёхуд ЙПХ планшетлари кимларни чув туширяпти?



керакмиди ё?..

Қанча беришим лозим? 115 минг сўм! Қандай қоида бузибман? Йўл белгиси! Жарима суммаси билан сабаби бир-бирига мос келмаяптими? Қаерда содир бўлган бу воқеа? Факт борми, видео ёки фото? Планшетда кўрсатилмас экан. Нега шу вақтгача хабар берилмаган? Бу ЙПХнинг муаммоси бўлмаса, кимнинг муаммоси? Огоҳлантирилмасам, мен қаердан биламан, сиртдан баённома тузиб юборишганини?..

Шу орада ҳалиги йигит телефон рақамимни ёзиб олди.

– Майли, машинангизни “стоянка” қилмаймиз, – ўзича марҳамат кўрсатган бўлди нозир. – Сизни ҳозирча қатъий огоҳлантирамай.

Планшетга бармоқ босишимни сўради. Қўлим чўққа теккандай куйди. Метан шохобчасидаги гурунглари эсладим бирдан. Нима бўлса бўлди энди. Машинага ўтирар эканман, “марҳамат”ининг нарҳини айтди – “камар-памарга ёзворарман”.

Билганингни қилмайсанми!.. Шартта кетвордим.

Барибир асабим бузилди. Икки кун ўйланиб юрдим: 30 май куни қаерга борган эканман? Карантин пайти эди-ку! Қандай қоида бузган бўлишим мумкин?.. Энг ажабланарлиси, Тошкент шаҳар ИИББ Йўл ҳаракати хавфсизлиги бошқармаси базасидан текширтисам, ҳеч қандай жарима йўқ экан.

Чиқмади! Анови нозир қаердан олди унда?! Гўл қилибди-да. Ёлғончи ЙПХ ходимининг психологик хуружи иш берганига қойил қолмай илож йўқ! “Камар-памар” деган жойидан жаримани илиб қўйибди. Яқин қариндошларини бир-бир эслашдан ўзга илож қолмади. Руҳий тинчланишнинг соф ўзбекона усулларини қўллаб, анча ўзимга келволдим.

Айтинг, фуқароларнинг асаби ЙПХчилар учун ўйинчоқми? Ҳайдовчилар руҳияти устида истаганча тажриба ўтказиш мумкин экан-да! Афсуски, бундақа лўттибозлар эғнидаги мундирни давлат кийдириб қўйганини, унинг ҳар қандай ножоиз хатти-ҳаракати халқда давлатга нисбатан ишончсизликни кучайтиришини ўйлаб ҳам кўрмайди. Президент ҳам амалдорларга қарата қовунни сенлар туширасан, жавобини эса мен бераман деган мазмунга ўхшаш гап қилганди бир гал.

Ушбу мақолани ёзишга мени мажбур қилган энг сўнги сабаб эса қашқадарёлик тадбиркор Шавкат Каромовнинг ҳасратлари бўлди. Унинг facebook ижтимоий тармоғида ёзганларини ўқидим-у, Йўл ҳаракати хавфсизлиги бошқармаси вакилларининг айнан планшет билан боғлиқ алдоқчилиги оммавий тус

олиб бораётганига шубҳам қолмади.

Ўзимиз айбдормиз: ҳар формалига давлатнинг одами деб ишонамиз, оғзидан чиққанини қонун деб биламиз. Зигирча ҳақимизни талаб қилсак, бошимизга бундан ҳам баттарроқ савдолар тушишига иқрорлик, афсуски, асрлар бўйи қон-қонимизга сингиб кетган бедаво касалликка айланиб кетди. Устига устак, инсоний ҳуқуқларимизни қўя тулинг, планшет дегич замонавий матоҳлардан ҳам айтарли беҳабармиз.

Тадбиркор воқеасига қайтайлик: Шавкат Каромов ЙПХ ходимлари тўхтатганида кейинги ҳафта-ўн кунлик ҳаёти югур-югурларга айланиб кетишини хаёлига ҳам келтирмаган эди. Планшетда кўришиб турган жарима шубҳа уйғотди. Қарзни бўйинга илиб юришга одатланмаган, тўловлардан вақтида қутулишга ўрганган. Наридан борса, беш-олти кунга чўзилади. Бу нимаси экан, деб ҳайратланди.

Ҳайдовчи икки ярим ой бурунги воқеани эслолмади, қандай қоида бузган эканман, дея сўраганида нозир “Аптчангиз йўқлигига бўлса керак”, дея тусмоллади. “Ё пирай”, деб ёқа ушлади у. Кўринмас одам пайдо бўлибдими? Ким унинг машинасига кириб, яширинча титкилаб, аптечка қидирибди. Қарши шаҳар бўлимидаги ходимлар 115 000 сўмлик жарима камар учун эканини тахмин қилишди. Бўлмаган гап, хавфсизлик камарини доим тақади. Қолаверса, шу пайтгача бирор “гаи” бунинг учун баённома тузмаган. Фото ёки видео радарларнинг ҳам мазкур функцияси ишга туширилмаган бўлса. Ахийри Ички ишлар

вазирлигига қарашли вилоят йўл ҳаракати хавфсизлиги бошқармасига бориб масалага аниқлик киритиб олди.

Эслади, 7 октябрь куни Нишон туманига борганида йўл нозирлари тўхтатувди. Бировининг четга олинг, четга олинг, деб чопқиллаб чиққани шундоқ кўз ўнгиди. Ўзини Ўткир Рўзиев деб таништирган ходим ҳужжатларга кўз югуртириб, планшетга бош бармоғингизни босинг, жарима борми-йўқми – текшириб бераман, деганди. Ана ўшанда огоҳлантирмасдан баённома тузиб юборибди-да шоввоз. Тартиб-қоидага кўра, жарима ёзилганидан ҳайдовчини хабардор этиш лозимлигини билмайдими Ўткир Рўзиев? “Унга ўхшашларнинг боши разилликдан чиқмайди. Вақти келиб, бир даврада ёзилиб-яйраб ўтиролмай қолади. Кишилар унга ҳаммиша ички ғазаб билан қарайди...” дея ўз кўнглига ўзи таскин беради ҳайдовчи.

Мен эса халқ ва ҳокимият ўртасидаги жарлик нималар ҳисобига ўпирилиб бориши ҳақида ўйлайман. Кўпинча биз журналистларни аҳоли орасида нуқул негатив, ёмон нарсалар излаб юришда айблашади. Аслида эса ҳўл ўтин ўт олмайди ҳеч қачон. Давлатнинг номидан иш тутадиган кимсалар эса ўзларининг ноқонуний фаолияти, куракда турмайдиган номақбул хатти-ҳаракатлари билан одамлар ўртасида норозилик кайфиятини уйғотаётганини наҳот ҳалигича тушуниб етмаяпмиз. Томчиём аста-секин томиб тураверса, тошни ёриши мумкин-ку!

Фаррух ЖАББОРОВ,
“XXI asr” мухбири

Хуршид Дўстмуҳаммад ҳақида ёзишнинг мен учун бир мунча ноқулай томони бор: Хуршид ака дастлабки ҳикояларим ҳақида матбуотда кейинги адабиётшуносликнинг эътиборини қаратган илиқ фикрлар билдирган, менга дастлабки “оқ йўл” тилаган, ҳамisha қўллаб-қувватлаган адиблардан. “Сен ҳақингда ёзгандан кейин сен ҳам ёзасан-да” деган адабиётшунослигимизнинг бугунги урф бўлган мезонига Хуршид аканинг номини қўшгим келмай бу забардаст адиб ҳақида ёзишдан доим ўзимни тийиб юраман. Ростки, Хуршид Дўстмуҳаммаднинг ҳар бир китобини ўқиганимда ёзгим, баъзан эса баҳслашгим келган. Лекин барибир ана шу истиҳола қўлимни боғлаб турган.

“Бозор” кўрган адиб

бир жанрда ёзилган.

Умуман, олганда, Хуршид Дўстмуҳаммаднинг дастлабки асарларидан токи “Донишманд Сизиф” гача бўлган деярли барча ҳикоялари, қиссалари, романларида концептуалликка интилиш яққол сезилади. Шу маънода адиб “Жажман”дан бошлаб барча асарларида ўқувчини ўзи билан тафаккур ўйини – бадиий шахматга таклиф қилади. Дастлаб Жажман билан Зардушт бобонинг ўртасидаги ўзаро кураш шаклида намоён бўлган бу ўйин “Донишманд Сизиф”да инсоннинг маҳкумлиги ҳақидаги изтироблар ва хулосалар сифатида яқин топади. Бу ўйинда на голиб бор, на мағлуб. Фақат бу асарларни ўқиб, ундан ўзи учун керакли хулосаларни ола билганлар голиб бўлади, холос. Адиб учун қолгани муҳим эмас. Умуман, адабиёт учун ҳам қолгани муҳим эмас. Барча асарлар ана шу сўнги голибликка интилади. Адабиёт майдонида оммавийликка мағлуб бўлган асарларнинг ҳаммасининг қисмати шу.

Менга Хуршид Дўстмуҳаммаднинг “Жажман” ҳикояси унинг барча асарларининг дастуриламали бўлиб туюлади. Таъбир жоиз бўлса айтиш мумкинки, адибнинг кейинги ўттиз-қирқ йиллик ижоди ушбу ҳикоядаги “...Махлуқ кўринди дегунча “Ма, Жажман, ма!” деб унга майиз, pista, ёнғоқ ташлайдиганлар чиқди. Жажман ҳеч кимдан тап тортмас, ҳаш-паш дегунча: “хайр-садақа”ни еб-халтасига солиб битирар, туршакни гоҳ данаги билан ютиб юборар, гоҳ қарсиллатиб чақиб мағзини чаппиллатиб чайнар эди. Унинг зиғирдек қўли, бармоқлари, зиғирдек тумшуғи-ю сичқонникидай оғзига, моғор тусидаги митти кўзларига қараб... бозорчилар кулгани-кулган эди, бора-бора унинг еб-тўймаслигидан, очофатлигидан юмалаб-юмалаб кулиб вақтичоғлик қиладиган бўлдилар. “Уни мен тўйдираман! Йўқ, қорни ёрилиб кетгунча мен боқаман уни!” деб баҳс бойлайдиганлар чиқди, лекин ҳар сафар “Тўйдираман!” деб катта кетганлар чув тушаверди, Жажманнинг еб тўймаслиги сирлигича қолаверди...” Тасвирни ҳар томонлама шарҳлашга қурилган деб айтиш мумкин бўлади. Бошқача айтганда, адиб ҳаёт деб аталмиш “бозор”нинг ўртасида ўтирганча, хоҳ замонавий мавзуда, хоҳ ўтмиш



бўлсин, воқелик, ҳолат, характер, иллат, муносабатларни “Зардушт бобо” ва “Жажман” деган тарозига солиб, кечаги ва бугунги Инсонга, инсоннинг азали ва абаддаги ўрнига ташхис қўйиб бераётгандай. Зардушт бобо ва Жажман тарозиси адибнинг руҳий-психологик таҳлилогача сингдириб юборилади.

Кейинги асарларида ҳам ана шу кичкина ҳикояда ўртага ташланган бадиий ташхис ё замонавий, ё тарихий қиёфада гавдаланади. Бу ҳикоядаги “бозор” кейинчалик ҳалол ва ҳаром ўртасидаги курашдан иборат тирикликни размлаштирган ҳаётнинг маънавий-руҳий манзараларининг мажози бўлган “Бозор” романига айланади. Ҳикоядаги турли образларнинг бир сўз билан ифода этиб кетилган ҳаракат ва ҳолатлари, чизгилари кейинчалик “Оромкурси”, “Паноҳ”, “Ибн Муғанний”, “Сўроқ” каби қиссаларнинг қаҳрамонларига айланади ва улар айнан ҳикояда ўртага ташланган қайсидир қарашларни, бадиий юкни ўзида мужассам этиб, адибнинг ижодий мақсадига, инсон талқинига, инсон ҳақидаги хулосаларига яхлитлик бағишлайди. Умуман олганда, “Жажман” ҳикоясидаги образлар, макон, ўртага ташланган азалий эзгулик ва ёвузлик ўртасидаги кураш замонидан қатъи назар, адиб ижодининг бадиий маконига, теранлашган, ойдинлашган, кўламлашган бадиий юк ташиган қаҳрамонларига айланади.

Бошқача айтганда, адиб битта “Жажман” ҳикояси орқали ўзининг ўзбек насридаги бош мавзуси, услуби, қарашларини, адабий кредо-

сини баён қилиб берадики, айнан бу хил ижодий матлаб дунё адабиётининг етук намоёндаларига хосдир. Шу сабабли “Жажман” ҳикоясини тўла тушунмай ёки унинг бадиий концепциясини англамай туриб, адибнинг шу ҳикоядан сўнг ёзган бошқа асарларини тўла маънода англаш, мағзини чақиш, ичига кириш мумкин эмас. Айнан шу ҳикоя Хуршид Дўстмуҳаммад деган адибнинг ижод дунёсига бошлаб киради ва унинг ҳалигача адабиётшунослар томонидан тўла шарҳланмаган ёки чала шарҳланган асарларига “гид”лик қилади, бу асарларнинг туб бадиий қимматини, поэтик хусусиятини кўрсатиб беради.

Хуршид Дўстмуҳаммад жаҳон адабиёти анъаналарини ўзбек адабиётига жасорат ва журъат билан синтез қилаётган, бу борада етарли тажрибага эга бўлган, ўзбек насрига ўзига хос янги типдаги образлар, шакллар, янги талқин олиб кирган, ўзбек адабиётида руҳий-психологик, рамзий-мажозий, экзистенциал фалсафий асарларга бўлган эҳтиёжни қондириб турган адиб саналади.

Яна ёшга қайтадиган бўлсак, мен Хуршид Дўстмуҳаммаднинг етмишга кирганига ишонмайман. Ёзаётганлари ва ёзганлари буни исботлаб турибди. Айнан шу ҳолат муҳтарам адибимиздан адабиётимиз ҳали ёшлик жўшқинлиги, жасорати, завқ-шавқи, муҳими журъати уфуриб турган асарлар кутиб қолишга ҳақли эканимиздан дарак беради.

Назар ЭШОНҚУЛ,
ёзувчи

<p>ТАХРИР ХАЙЪАТИ: Ақтам ХАЙТОВ Дилшод ШОУМАРОВ Шухрат БАҒОЕВ Мавлуда ХУҶАЕВА</p>	<p>MUASSIS: TADBIRKORLAR VA ISHBILARMONLAR HARAKATI – O‘ZBEKISTON LIBERAL-DEMOKRATIK PARTIYASI</p> <p>XXI ASR IJTIMOIY-SIYOSIY GAZETA HAFTALIK NASHR</p> <p>Бош муҳаррир Норқобил ЖАЛИЛОВ</p> <p>Сирожиддин САЙИДИ Алхам ШОДМОНОВ Виктор ПАК Насимжон АЛИМОВ</p>	<p>Фаррух ЖАББОРОВ Бош муҳаррир ўринбосари</p>	<p>Тахририят манзили: Тошкент шаҳри Нукус кўчаси 73^а-уй.</p> <p>электрон почта: xxi_asr@mail.uz xxi_asr@mail.ru</p> <p>Телефонлар: қабулхона – 71 215-63-80 (тел./факс). Обуна ва реклама бўлими – 71 255-68-50.</p>	<p>“XXI asr” ижтимоий-сиёсий газетаси Ўзбекистон Матбуот ва ахборот агентлигида 2011 йил 14 июнда 0009-рақами билан рўйхатдан ўтказилган.</p> <p>“Шарқ” нашриёт-матбаа акциядорлик компанияси босмахонасида чоп этилди.</p> <p>Корхона манзили: Тошкент шаҳри Буюк Турон кўчаси 41-уй. Газета офсет усулида, А-3 форматда босилди. Ҳажми – 3 босма табоқ. Буюртма рақами: Г – 151 Тираж: 3209 Баҳоси келишилган нарҳда. Топширилди – 18:30</p>	<p>Тахририятга келган қўлёзмалар тақриз қилинмайди ва муаллифларга қайтарилмайди.</p> <p>© “XXI asr” дан олинган маълумотларга манба сифатида газета номи кўрсатилиши шарт.</p> <p>Муаллифлар фикри тахририят нуктаи назаридан фарқ қилиши мумкин.</p> <p>Газета тахририят компьютер марказида терилди ҳамда дизайнёр</p> <p>Маъруфжон Раҳмонов томонидан саҳифаланди.</p>	<p>ISSN 2181-497X</p> <p>НАШР КЎРСАТКИЧИ: 406 1 2 3 4 5 6</p> <p>Навбатчи муҳаррирлар: Озод РАҶАБОВ, Беҳзод ИСРОИЛОВ.</p>
--	--	---	--	---	---	---